

homme & vne femme estans dans les bois, vn Ours vint qui se ietta sur l'homme, l'estrangla & le mangea: Vn lièvre d'espouuantable grandeur se jetta sur la [173] femme & la deuora: Il ne toucha point neantmoins à son enfant qu'elle portoit encor dans son ventre, dont elle estoit preste d'accoucher: Vne femme passant en cét endroict vn peu apres ce carnage, fut fort estonnee voyant cét enfant viuant, elle le prend, l'esleue comme son fils, l'appellant neantmoins son petit frere: auquel elle donna le nom de Tchakabech, cét enfant ne creut point en grandeur, demeurant tousiours comme vn enfant au maillot: mais il paruint à vne force si espouuantable, que les arbres seruoient de flesches à son arc. Je ferois trop long de raconter toutes les auantures de cét homme-enfant: il tua l'Ours qui auoit deuore son pere, & luy trouua encore dans l'estomach sa moustache toute entiere: il fit aussi mourir le grand Lièvre qui auoit mangé sa mere, ce qu'il recogneut à la trouffe de cheueux qu'il luy trouua dans le ventre. Ce grand Lièvre estoit quelque Genie du Iour, car ils nomment l'vn de ces Genies, qu'ils disent estre grand causer, du nom de Michtabouchiou, c'est à dire grand Lièvre. Pour abreger, ce Tchakabech voulant aller au Ciel, monte sur vn arbre, estant quasi à la cime il souffle contre cét arbre, lequel [174] s'esleua & grandit au souffle de ce petit Nain, plus il montoit, plus il souffloit & plus l'arbre s'esleuoit & grandissoit, en sorte qu'il paruint iusques au Ciel: où il trouua le plus beau pays du monde; tout y estoit rauissant, la terre excellente, & les arbres tres-beaux: ayant bien tout considéré, il vint rapporter la nouvelle de tout cecy à sa fœur pour l'induire à monter au Ciel & y demeurer à iamais.